

Bergrennen Reitnau So. 28.6.2026 "Auf Flügeln des Adlers"

Input am Bergrennen 28.6.2026

Pfr. Matthias Schüürmann

High/Low City-Band Lied Nr. 1: Count em

Begrüssung: 3' "Die auf den HERRN harren, kriegen neue Kraft, dass sie auffahren mit Flügeln wie Adler" Mit dene Wort us **Jesaja 40,31** möcht' ich Eu alli, liebi Bergrenn-Fans, liebi Gäst vo nah und fern, ganz hätzlich zum Gottesdienst uf de Rennstrecki begrüesse - **am 57. Bergrenne vo Reitnau!** **Flüge mit Flügel vom Adler** – was für-n-es G'fühl mues das sy! **Vieli wünschted sich das: Freiheit – Wiitsicht!** I denke: Au Rennfahrer chönntet mängisch Flügel bruuche, um über Hindernis hinweg z'flüege...

Mir freued eus, dass mir hüt 's **57. Bergrenne** chönnd fiire und jetzt isch Ziit für «**Sprit för's Läbe**» - e geistliche Stärchig uf de Rennstrecki!

Min Name isch **Matthias Schüürmann**, i bi siit 13 Jahr do **Pfarrer** vo de **Ref. Chile Reitnau- Attelwil-Wiliberg** – die grad wäge Renovation im Gerüst stoht!

De **Gottesdienst uf de Rennstrecki in Reitnau** isch e wertvolli Tradition und söll dezue diene, **dass mir innerlich chönd uftanke!** De Sunntig isch de Tag vom HERR, wo Gott b'sunders zu eus wott rede!

I freu mi, dass d'**Band High/low-City** mit junge Musiker vo Reitnau & Umgäbig de Gottesdienst mit ihrne Lieder begleitet: I möcht allne herzlich danke, wo de Gottesdienst mit Musik, Technik und Infrastruktur ermöglicht händ, allne Sponsore, sowie Engagierte vor und hinter de Bühni! En ganz bsondere Dank gilt em **A.M.**, wo vieles für de Gottesdienst organisiert hät. **Mir ghöred jetzt 's nächste Lied vo High/low-City:**

Band high/low-city Lied Nr. 2: Die Gueti Botschaft

Predigt / Input: «Auf Flügeln des Adlers getragen» **Jesaja 40,28-31**

Liebi Fans vom Bergrenne! Im **Buech Jesaja** stoht **de bemerkenswerthi Satz:** «**Die auf den HERRN harren, kriegen neue Kraft, dass sie auffahren mit Flügeln wie Adler**». Händ ihr gwüsst, dass es frühner emol e Auto-Marke mit Name «**Adler**» hät gäh - au **Rennautos** händ sie gmacht...! Da hät's z.B. i de 30er Jahr (vom letzte Jh.) di sgn. **Adler Trumpf Rennlimousine** gäh, e **Zweisitzer** mit fascht 2 Liter Hubraum, wo mit **56 PS** und eme Gwicht von **1 Tonne** e Höchstgschwindigkeit von **150 Km/h** uf de Stross heregleit hät – **immerhin, scho damals!**

En Adler, für öis de Inbegriff von Chraft, Majestät, Gschwindigkeit und Sehschärfi - dargstellt in vielne Wappe (*Adlerfahne*) - isch natürlich **en verlockende Name für es Rennauto.**

Grad neulich hät's e SRF-Doku über de Steinadler gäh. Händ Ihr gwüsst: I de Schwiiz git's öppe 400 Bruetpaar vo Steinadler, – das isch e gueti, gsättigti Population: Für meh hät's nid Platz (wäge-m grosse Jagd-Revier vom Steinadler). Die gueti Population stoht ganz **im Gägesatz zu frühner**, wo de Steinadler als Jagdkonkurrenz fascht usgrottet worde wär. De Steinadler isch di einzig heimische Adlerart i de Schwiiz. Er wird au »König der Lüfte« g'nännt. Sie händ e

Flügelspannwiiti vo bis 2.20m – **majestätisch, wie die chönd flüüge**. I eusere Gägend gsehn mer ja vor-allem d' Rot- & Schwarzmilan, wo au sehr graziös flüüge chönd. Steinadler sind einfach viel grösser und chönd **es Gwicht vo fascht 7 Kg erreiche**. Mit ihrne Schwinge tüend sie ihre Jung schütze und wenn nötig uffange! I freier Wildbahn werdet Steinadler öppe **25 Jahr alt**.

I möcht Eu gärn no es paar wiitere Highlights vo dem faszinierende Vogel gäh - es Tier vo de Superlative – es Wunder vo den Schöpfig Gottes:

Im Sturzflug cha de Steinadler **e Gschwindigkeit von 320 Km/h** erreiche und gilt demit als **zweitschnellste Vogel vo de Wält – nume de Wanderfalk** isch im Sturzflug no es bizeli schneller: **322 Km/h**. De Steinadler cha **im Flug es Gwicht vo öppe 5 Kg umeträge** – also öppe sis eigene Körpergewicht! **Drum sind jungi Rehkitz oder Gämsli vo em Steinadler nid sicher – er chönnti sie im Flug erbüete und demit wegflüüge...** Stell dir vor: **Du sötscht e 60-70-80 kg schwäri Last nid nume lüpfe, sondern au no demit umeflüüge....! Erstuunlich!** 's **Revier (Jagdgebiet)** vomene Steinadler isch riesig, öppe 35 – 150

Quadratkilometer = 15.000 Hektar. Mir kennet ja 's Sprichwort: Sehen wie ein Adler = sehr gut sehen! Steinadler chönd es Murmeli bis uf e Distanz vo 3 Km gseh. Sie händ im Aug 5x meh Liechtzelle wie mir Mönsche und chönd sogar **ihres Aug als Feldstecher** bruuche: Wiitblick oder nöcher herezoome.... Ja, Steinadler sind **geboreni Flugkünstler** und **chönd bi jedem Wetter flüüge! Kei Sturm macht ihne Angscht** – im Gägeteil: **Als erfahreni Gebirgsvögel** nutzt sie die extreme Wetterbedin-gige i de Alpe oft g'schickt us. Mit d'Thermik löhnt Steinadler sich i de Höchi lah träge. Sie chönd bis über 4000 m ufestiige! Vögel wüsset am Beste, wo's Thermik hät – **drum nutzt Sägel- und Gleitschirmflüger das Wüsse vo de Vögel gärn... Ja, so imposanti Vögel!**

I **de Bible** wird 's Bild vom Adler öfters ufgriffe und in **Jesaja 40,31** säit Gott: Wenn Du müed und matt bisch – denn han I **e Lösig** für Dich! **Müed, matt, abgschlage, frustriert, bedrängt, gmobbt, allei glah, über's Ohr ghaue, voller Angst wäge Chrankheit, wäge unsichere Arbeitsstell, wäge Beziehigsproblem** – ja, mir kennet vieli Situatione, wo mir müed & matt chönd sy. **Weli Lösigsstrategiee bruuched mir? Wie-nen Wald voll Affe usrüefe..., de Bättel herreschmeisse und resigniere..., anderi euse Frust lah gspüre...** All das isch nid sehr ufbauend... **Wie gseht Gottes Lösig us?**

Gott seit in Jes 40: Die auf den HERRN harren, kriegen neue Kraft, dass sie auffahren mit Flügeln wie Adler, dass sie laufen und nicht matt werden. Gottes Lösig – au für di – heisst: Harre des HERRN! Das Wort «harren» bedüüet soviel wie: **Setz diini Hoffnig & dis Vertraue ganz uf Gott! Halt fest a Gott, tue usduurend warte uf siini Hilf! Glaub dra, dass Gott für Di en Uswäg hät, dass ER für di alles zum Guete wird führe! Denn wirsch Du wie'nen Adler uffahre, du wirsch laufe und nid müed werde!!**

Das tönt so einfach... und isch doch so aspruchsvoll! Will's bedüüet: Di eigene Lösige und Strategiee loslah und zu Gott z'säge: HERR, i bruche diini Hilf! I

bruche diini Nöchi! Gott isch eus Mönsche dur siin Sohn Jesus Christus nöch cho. Dur Jesus darfsch Du Zuegang zu Gott ha – **Er hät de Wäg zum Vaterhuus, zur Erlösig, freigmacht!** Die Lösig vo Gott heisst: De Heiland Jesus Christus!

Wie guet das tuet: Dur Gottes Chraft uffahre mit Flügel vomene Adler, i de Freiheit vo siinere Vergäbig dörfe umesägle. **De Adler hät kei Angst vor 'm Sturm!** Ja, die Freiheit wünsch i Dir und allne Rennfahrer vo Härze: **Die auf den HERRN harren, kriegen neue Kraft, dass sie auffahren mit Flü-geln wie Adler! Amen.**

Band high/low-city Lied Nr. 3: Lob dr HERR

Gebet und Segen ' **Denn wänd mer jetzt mitenand bäte und Gott um sin Säge bitte:** Liebe Vater im Himmel, mir danket Dir für de hütigi Sunntig, für dini Gegewart, für dis Rede zu öis! Danke HERR, dass mir bi Dir Geborgeheit erfahre dörfe – wie **unter de Flügel vom Adler.** Bis Du ganz b'sonders mit allne, wo's schwer händ im Läbe und nid wüssed, wie wiiter. Begägne ihne persönlich und gib Du nöii Chraft und Muet, dass sie sich mit nöiem Elan emporhebe chönd mit dinere Hilf, **mit Flügel vom Adler!** Zeig öis, wo mir anderne chönd biistoh. **HERR Jesus Christus,** mir bittet Dich um Din Säge, Bewahrig und Schutz für di Rennfahrer uf de Rennstrecki, und um diini Freud und Säge bi aller Gmeinschaft und allem Zsämmesii - **und mir bättet jetzt gmeinsam s' Unservater-Gebet:**

Unser Vater im Himmel, geheiligt werde dein Name. Dein Reich komme, Dein Wille geschehe, wie im Himmel, so auf Erden. Unser tägliches Brot gib uns heute, und vergib uns unsere Schuld, wie auch wir vergeben unseren Schuldigern. Und führe uns nicht in Versuchung, sondern erlöse uns von dem Bösen. Denn Dein ist das Reich und die Kraft und die Herrlichkeit, in Ewigkeit, Amen.

Segen: *Mir dörfed jetzt bewusst de Säge vo Gott i Empfang näh:*

Die auf den HERRN harren, kriegen neue Kraft, dass sie auffahren mit Flügeln wie Adler!

Der HERR segne dich und behüte dich; der HERR lasse sein Angesicht leuchten über dir und sei dir gnädig; der HERR hebe sein Angesicht über dich und gebe dir seinen Frieden. Amen.

I wünsche allne no en ganz schöne Tag! – Für Frage, Seelsorg & Gebät cha me sich gern a Eus wende!! Pfarrhaus-Kirche

Band high/low-city Lied Nr. 4: Meant to live